

Te ngaro huarākau nō Queensland

– ngā mea me mōhio



Biosecurity New Zealand
Ministry for Primary Industries
Manatū Ahu Matua

He tūkino huarākau me te huawhenua te mahi a ngā ngaro huarākau, otirā ka aukati i te tukunga o ā tātou hua kai ki tāwāhi.

I kitea tētahi ngaro huarākau tame kotahi nō Queensland i te 7 o Hānuere 2026 ki tētahi toromāhanga tūtei i tētahi kāinga i Puketāpapa, Tāmaki Makaurau.

Kua tīmata tētahi kaupapa haumarua koiora hei urupare ki te kitenga o te ngaro huarākau. E whakarite ana ētahi tira kaimahi i ētahi toromāhanga ngaro huarākau anō i te rohe, ā, kua whakaritea ētahi herenga ā-ture.

He aha te ngaro huarākau nō Queensland, ā, mā hea mai ki konei?

I tōna kāinga taketake, ka whakapauhia e ngā kaiwhakatipu te hia miriona tāra i te tau ki te whakahaere i ngā mahi whakakino a te ngaro huarākau nō Queensland.

Kua horapa haere atu i Queensland ki ētahi atu wāhi o Ahitereiria, Niu Karetōnia, French Polynesia me ngā moutere o Pitikeina.

Ka whakawhānau hua ngā ngaro pakeke ki roto i ngā huarākau. Ka whānau mai ngā iro ka kai haere i te huarākau me te aha ka pirau. Neke atu i te 200 ngā momo huarākau me te huawhenua ka kainga e te iroiro. Ko te kuāwa, te hua karihi, te tōmato me te mango ngā mea pai ki te iroiro.

Kei a Tiakitanga Pūtaiao Aotearoa ngā herenga whakahaere pakari rawa o te ao mō te kawenga mai o ngā huarākau, me ngā tirotirohanga i te paekati whenua. Ko te huarahi pea i tae mai ai ngā ngaro huarākau ki Aotearoa, i runga i ngā huarākau me ngā huawhenua.

Kei te aha i Puketāpapa?

Ehara te mauhanga o te ngaro huarākau tame kotahi i te tohu o te huinga ngaro huarākau e whakaputa uri ana. Engari, i a mātou e mahi ana i ngā tirohanga mēnā he ngaro huarākau anō kei konei, kei te rapu āwhina mātou i te hapori ki te ārai atu i te horapatanga.

Ka whakapikihia ngā mahi toromāhanga me te tirotiro, otirā ka tirotirohia i ia rā tētahi rohanga 200 mita atu i te wāhi tuatahi i kitea, ā, ka tirohia ngā toromāhanga kei tētahi atu rohe i ia toru rā, atu ki te 1500 mita.

Hei whakatūpato noa, kua whakaritea ētahi herenga ā-ture ki te nekehanga o ngā huarākau me ngā huawhenua ki waho ake o te rohe i kitea ai te ngaro huarākau.

Ka kite pea koe i te kōkiritanga o ētahi whakahaere i tō paekiritata, i a mātou e tirotiro ana, e whakarite toromāhanga ana hoki. Ka pātai pea ā mātou āpiha kia tirohia ngā rākau hua i tō kāinga. Ka whakaaturia e rātou he tohu tuakiri ōkawa, ā, me whakaae rawa koe e uru ai rātou ki tō kāinga.

Ki te kite koe i ētahi hua ngaro, iro rānei ki ō huarākau, me wawe te here ki rō pēke kirihou, ka waea mai ki a mātou ki: **0800 80 99 66**.

Pānui Rohe Herenga – ngā mea me mōhio

I tēnei wā kua mana tētahi Pānui Rohe Herenga ki te rohe o Puketāpapa, e here ana i te nekehanga o ngā huarākau me ngā huawhenua. Kua wehea te wāhi rā ki ngā rohe e rua, ko A me te B, otirā he rerekē ngā herenga.

Mēnā kei taua rohe koe e noho ana, ā, kei te whakataka kai mō te tina, i te kura, te mahi rānei, he pai tonu te whakauru i te huarākau me te huawhenua, engari me tapatapahi ka tirotiro kia kite mēnā he iro i roto.

Ko te rohe A he rohe 200-mita te whānui. Ko te rohe B he rohe 1,500-mita te whānui.

Tirohia mēnā kei roto koe i te rohe herenga, ā, ko tēhea te rohe e whai pānga ana ki a koe kei tā mātou paetukutuku: www.biosecurity.govt.nz/fruitfly

Ka kitea hoki ngā kaimahi a Tiakitanga Pūtaiao Aotearoa i te rohe e toha ana i ngā mōhiohio, me ngā tohu e whakaatu ana i te rohe herenga.

Mēnā kei Rohe A koe e noho ana – Kāore e āheitia te neke i ngā huarākau me ngā huawhenua (hāunga ngā huawhenua raurau, huaone rānei, ngā kai kua tunua, kua tārokitia, kua whakamaroketia, ngā kai whakatio, ngā kai tini rānei) ki waho o Rohe A o te rohe herenga.

Kāore hoki e āhei ki te neke i ngā whakapōpopo me ngā para kākāriki o ngā māra ki waho ake o tēnei rohe.

Ko te tono ki ngā kirinoho o Rohe A kia kaua e whakapōpopo i ngā huarākau me ngā huawhenua. Me whakawehe ngā para huarākau me te huawhenua i ētahi atu o ngā para o te kāinga, ka porowhiu kē ki te pūrere para o te puoto mēnā kei a koe tētahi, me rau rānei ki ngā ipu i whakaratoa e Tiakitanga Pūtaiao Aotearoa. Taro ake nei ka haria atu ngā ipu nei, ā, ka whakamōhiotia ngā kirinoho ki hea tū ai. Ka taea te putu tonu i ō para ahuhānui ki tō kohinga para taunoa.

Me waiho ngā huarākau me ngā huawhenua nāu i whakatipu, i taka ki te papa, ki reira tonu ki tō māra. Ka kohia pea ēnei e ngā kaitirotiro a Tiakitanga Pūtaiao Aotearoa ki te tiro mēnā he ngaro huarākau kei roto.

Ko ngā para huarākau me te huawhenua o te kāinga kua oti kē te tapahi, ā, kāore he ngārara i roto, ka taea te porowhiu ki ngā ipu a Tiakitanga Pūtaiao Aotearoa.

Mēnā ka kitea he hua ngaro, iro rānei ki ngā hua i whakatipuria i te kāinga, tēnā herea ngā huarākau me ngā huawhenua katoa ki rō pēke kirihou, ka waea ki Tiakitanga Pūtaiao Aotearoa ki **0800 80 99 66**.




GIA Operations Limited: Biosecurity through Partnership

Te Kāwanatanga o Aotearoa
New Zealand Government

Kohitātea 2026

Rohe Herenga



Mēnā kei Rohe B koe e noho ana — Kāore e āheitia te kawē i ngā huarākau me ngā huawhenua i whakatipuria i Zone B ki waho ake o te rohe herenga. He pai noa te neke haere i ngā huarākau me ngā huawhenua i hokona i te toa (arā, i te hokomaha) ki waho o te rohe. Me porowhiu ngā hua i whakatipuria i te kāinga, me ngā para o te māra, ki ngā ipu a Tiakitanga Pūtaiao Aotearoa.

Ki te rangirua, kaua e haria.

He aha te tūpono pānga ki ngā pakihi?

Ina muimuia tātou e te ngaro huarākau nō Queensland, ka piki ngā utu whakahaere, ka heke ngā whiwhinga hua, ā, e kore pea ētahi whenua e hiahia ki ā tātou hua kawē atu. Tērā pea he pānga nui rawa tēnei ki ngā pakihi ahuhenua o Aotearoa.

Me pēhea te tautuhi i te ngaro



Ngā ngaro pakeke:

- he nui ake i te ngaro o te kāinga (6mm ki te 8mm te roa);
- he kōkōwai te tae me ngā wāhanga kōwhai kōhure;
- he kōataata ngā parirau.

Mō ngā kōrero hou:

Ka kite ngā mōhiotio whānui mō te ngaro huarākau nō Queensland me te urupare haumarua koiora ki:
www.biosecurity.govt.nz/queensland-fruitfly